

na prijedlog Vlade Unsko-sanskog kantona, po skraćenom postupku, na 33. redovnoj sjednici održanoj 19.06.2017.godine, Skupština Unsko-sanskog kantona, donosi

ZAKON

o izmjeni Zakona o šumama

Član 1.

U članu 10. stav (1) Zakona o šumama ("Službeni glasnik Unsko-sanskog kantona", br. 22/12 i 16/16), mijenja se i glasi:

"(1) Šumsko privredne osnove za šume u državnom vlasništvu izrađuje korisnik šuma koji posjeduje certifikat ili saglasnost nadležnog organa, a za šume u privatnom vlasništvu izrađuje pravno lice koje je registrovano u skladu sa odredbama važećeg Zakona o registraciji privrednih subjekata, koje posjeduje certifikat nadležne institucije i koje je izabrano u skladu sa važećim Zakonom o javnim nabavkama. Ukoliko se određene usluge izrade šumsko privredne osnove za šume u državnom vlasništvu pribavljaju od drugog pravnog lica, iste se pribavljaju u postupku javne nabavke prema važećem Zakonu o javnim nabavkama."

Član 2.

U članu 91a, riječi "šest mjeseci" zamjenjuju se riječima "dvanaest mjeseci".

Član 3.

Ovaj Zakon stupa na snagu osmog dana od dana objavljivanja u "Službenom glasniku Unsko-sanskog kantona".

Broj: 01-02-1-551/17 19. juna 2017. godine Bihać	Predsjedavajući Skupštine Unsko-sanskog kantona Nijaz Hušić, prof.
--	--

462.

Na osnovu člana 11. b) odjeljka A poglavlja V i člana 2. b) poglavlja IV Ustava Unsko-sanskog kantona - Prečišćeni tekst ("Službeni glasnik Unsko-sanskog kantona" broj 1/04 i 11/04) na prijedlog Vlade Unsko-sanskog po hitnom postupku, na 17. vanrednoj sjednici održanoj 22.06.2017. godine, Skupština Unsko-sanskog kantona donijela je:

ZAKON

o verifikaciji školskih svjedodžbi/diploma stečenih u periodu od školske 2013/14 godine do školske 2016/2017 godine u okviru Katoličkog školskog centra "Ivan Pavao II" Bihać

I. OPĆE ODREDBE

Član 1.

(Predmet zakona)

(1) Ovim Zakonom uređuje se način postupka verifikacije školskih svjedodžbi/diploma stečenih u periodu od školske 2013/14 godine do školske 2016/17 godine u okviru Katoličkog školskog centra "Ivan Pavao II" Bihać (u daljnjem tekstu: škola).

(2) Svjedodžbe/diplome o završenom odnosno stečenom obrazovanju u periodu od školske 2013/14 godine do školske 2016/17 godine u okviru škole verifikuju se u skladu sa odredbama ovog Zakona.

Član 2

(Verifikacija)

Verifikacijom svjedodžbi/diploma priznaje se završen razred odnosno obrazovanje u okviru škole za zanimanje medicinska sestra-tehničar i zanimanje zubni tehničar za period od školske 2013/14 do školske 2016/17 godine.

II. NAČIN I POSTUPAK VERIFIKACIJE

Član 3.

(Način i postupak verifikacije svjedodžbi/diploma)

(1) Verifikacija svjedodžbi/diploma vrši se na osnovu dostavljene matične evidencije škole, za svaku svjedodžbu/diplomu.

(2) Matična evidencija škole bit će zaključena donošenjem ovog Zakona i ovjerena pečetom Ministarstva obrazovanja, nauke, kulture i sporta (u daljnjem tekstu: Ministarstvo).

(3) Za vršenje verifikacije svjedodžbi/diploma škole Ministarstvo obrazuje Komisiju za verifikaciju svjedodžbi/diploma stečenih za zanimanje medicinska sestra-tehničar i zanimanje zubni tehničar u periodu od školske 2013/14 godine do školske 2016/17 godine (u daljnjem tekstu: Komisija).